

遼陽縣志五編

物產

周南一什終以騶虞說者謂仁民餘恩及於庶類故草木茂而禽獸多蓋物產盈虛於
人民生計有直接之關係規國者所必及也豈惟是誇多鬪靡侈廣聞見云爾哉爰以
次列之

物產志卷二十八

九州方物不齊大都因水土氣候之適宜繁衍孳育以生以長不獨江淮橘柚易地弗良也今之遼陽一縣境耳然飛潛動植鑛各產有其他省縣普通產者有特生而獨產者舟鮫虞衡所難盡識山經爾雅所不及載間或有之爰追荒作兼別芸生非闕靡也聊供博物家之研究云爾述物產志第二十八二十九三十

植物 穀屬

稷 禮記謂之明粢說文齊也五穀之長明一統志作稌今稱糜子去殼為大黃米晚種早熟邊地尤宜

黍 禮記曰薺合說文禾屬而黏者也又云黍有二種黏者謂秬不黏者謂黍爾雅翼黍大體似稷古人併言黍稷總之皆黃米屬可釀黃酒米粉清代貢品

蜀黍 種始自蜀今呼高糧土人用為常飯漚為米粉食品頗佳又呼糲子清代亦充貢蜀黍入麴燒酒糟粕可飼牲畜私燒者禁糶可以織蓆造紙土人用以為薪本境土產

此為大宗

黏蜀黍 穀分黃黑二種與蜀黍無異但性黏耳又一種蒼帚黍性黏穗長可製為帚

稻 即詩之稌有紅白二種黏者為糯不黏者為粳又有一種曰秬比秬小早熟今人號

秬為早稻秬為晚稻出遼陽者色微青味尤香美號遼陽青又桃花米為清時貢品

黏稻 即糯子味甘香可釀酒可為糕粽等食品或漚為米粉最佳

粱 較粟米粒大兼有紅白青黃諸色白粱即詩經之芑赤粱即爾雅之藁

粟 古以米之有苧殼者稱粟今以穀之最細而圓者為粟穀曰飯穀米曰小米按周禮

九穀六穀之名有粱無粟則粱亦粟也今小米色黃即黃粱也清時以此米及穀草充

賦

穞 爾雅謂之粟色赤性黏今呼小黃米亦有色黑性黏者

小麥 毛傳及群芳譜云小麥名來來苗生如韭成似稻高二三尺實居殼中芒生殼上

生青熟黃本境春種夏收與內省秋麥異然不及秋種者佳說文云麥屬金金旺而生

火旺而死邑西窪下地多種之

大麥 大麥與小麥芒葉相同名牟芒長穀與粒相黏未易脫小麥食法極多大麥止可碾米作粥飯及飼馬作麩藥之用此其異點也縣境西部窪田多種者通志云大小二麥夏無霧雨則收

蕎麥 伏種秋收高一二尺花白色結實成三角形種則皮色黑內粉細白味佳美境內晚田多有種者通志云其麩以黑龍江者爲勝歲取充貢本境燒鍋或用以造麩

穧麥 有二種一類小麥而大一類大麥而大近年地成熟種之者少稗 宜下隰地米最甘滑遼陽西鄙多有種者米可食及造飴糖不舂時可飼家畜藁可餵畜及苦房俗呼稗草

秔稗 多生秔地甘滑如秔土人以爲秔所化俗名梗稗草

玉蜀黍 莖葉似蜀黍子藏包中俗呼包米清時內務府漚粉充貢

西番穀 苗高如蜀黍葉如穀穗如蒲棒粒周穗外亦可食種者少俗名西黏穀煮粥食

高麗穀 穗火紅色類雞冠花東北邊種者多遼境亦間有之

薏苡 漢馬援征交趾載其種還今名草粟子入藥曰薏苡仁種宜窪地

蘇 爾雅謂之桂荏今有紫白二種收子榨油甚多產宜高地特以豆油充斥而蘇油罕見於市

脂麻 正字通云脂麻即油麻俗呼芝麻油曰香油爲油類中上品上地多有種者

蓖麻 盛京通志云子斑紅如牛蝨者可入藥黯花者俗名大麻子二種俱可榨油今洋藥房所買蓖麻油即此

火麻 雄曰泉雌曰苴子曰釐可榨油皮漚爲麻曰線麻清內務府以之上官

大豆 古謂之菽今分黑白黃褐青斑諸色按通志所載諸色分別如左色黑者曰黑豆又名烏豆又有大烏小烏之別味苦不可食糲者入藥名糲黑豆色白者俗稱白眉豆色黃者名黃豆俗稱金黃豆色青者俗稱青皮豆合黑白黃青統曰大豆遼境所產最多佔輸出品之鉅額

小豆 有鰲白赤黃黑數種赤者入藥

綠豆 本草舊書皆作菘豆李時珍改菘爲綠性甘寒清熱解毒通志云粒粗而深綠者爲上粒潤而淡綠者次之較大豆粒小而圓與諸色大豆形性俱不同境內種者較大豆爲少磨麪可製饊餌漚粉可製條粉粉皮生芽可爲蔬

豌豆 博雅豌豆豌豆皆是也爾雅謂之戎菽李時珍曰豌豆種出西湖其苗弱柔宛宛故得名百穀中最先登者嫩時青色老則斑麻遼志謂之回鶻豆今有大小二種性不畏寒不擇土種者甚多

豇豆 爾雅胡豆豇也李時珍曰豇豆蔓生莢必雙生有紅白二種長而肥者充蔬皮薄者秋成食子名打豇豆廣雅指爲胡豆誤矣今本境豇豆儘可充蔬打豇豆吉江兩省多有之廣雅以爲胡豆非無因也

菹豆 色亦不一白者入藥李時珍曰本作扁莢形扁有早晚二種入藥者曰扁豆今本境呼爲氣豆

菜豆 如扁豆而狹長可爲蔬

刀豆 酉陽雜俎言樂浪有挾劍豆莢生橫斜如人挾劍即今刀豆也
雲豆 種自雲南來故名雲豆味頗佳子有白黑灰紫等色莢有長短

蔬類

韭 禮經名豐本早春最美可供祀今爲常蔬南史周顒傳春初早韭即此園韭可種葉似薤而肥大高尺許六月出莖開小白花尖瓣六出攢簇成叢結子色黑如葱子

山韭 與園韭葉畧同作淡紫色獨莖一葉詩六月食鬱即此爾雅謂之薺

葱 春發名羊角秋種以白露味辛葷爲蔬菜中調味之品蘇頌圖經葱有數種入藥用山葱胡葱食品用凍葱旱葱

山葱 爾雅謂之蒼葉似藜廣雅云蒼山葱凡山韭山葱清內務府以時入貢

蒜 爾雅翼大蒜爲葫小蒜爲蒜中國種係大蒜也群芳譜云張騫得西域種歸國傳種遂徧中國爾雅蒿山蒜也釋曰葷菜說文葷菜即今大蒜蒿乃今小蒜有紫皮白皮二

種

菘 坤雅菘性隆冬不凋四時長見有松之操南史周顒傳秋末晚菘即此李時珍曰今俗呼白菜有二種肥厚嫩黃者爲黃芽白窄勁者爲箭桿白近有疙疸白種來自外國山東白種來自山東皆菘類也

芥 芥之類甚多楊子方言鹽蕘趙魏之間謂之大芥其小者謂辛芥或謂之香芥爾雅翼芥似菘而有毛極辛苦俗以大芥爲芋芥以馬芥爲癡芥白芥子入藥

芹 爾雅釋草芹楚葵郭注水中芹菜一作漈說文漈菜類蒿呂氏春秋菜之美者雲夢之芹高誘注芹生水涯即今之水芹菜也又名野芹考野芹頗多莖葉花子皆似園芹但園芹係單莖半圓野芹則歧莖通體俱圓園芹大如箸莖色青綠野芹莖粗倍之色有紫者此其不同也

藕 爾雅釋草荷芙蕖其根藕說文作藕一葉一華華常偃故名藕境內水池時有種植者惟其鬆脆次於南省

菠薐菜

劉禹錫嘉話錄菠薐種自西國來有僧其子來云是頗陵國種語訛爲菠薐耳李時珍案唐會要云唐太宗時尼波羅國所獻今呼菠薐即此春初秋末種之

蒿苳 俗名生菜本草附入白苳杜工部有種蒿苳詩葉由根生者尖闊由莖生者爲心臟形可生食

薺臺

俗呼臭菜子可榨油本草又名油菜秋末春初菜種食臺

薺萎

張騫使西域得此種一名胡萎又名芫萎韻會胡萎即俗呼香菜

茴香

一名懷香有大小二種本草謂生佛誓國又名慈謀救實如馬芹爲大茴香一名

蔣蘿內生蟲可治疔爲小茴香高可四五尺葉裂如紛夏開小黃花子黑色入藥

花椒 李時珍曰其葉對生一枝五葉莖葉有刺四月生細花五月結實生青熟紅大於

蜀椒特不及蜀椒黑耳羣芳譜一名花椒一名檉生泰山瑯琊間秉五行之精故葉青

皮紅花黃膜白子黑氣香今俗呼花椒食品所需種於園圃者稍差遼境園圃中亦有

栽種者但冬令畏寒須設法護持之

秦椒 結椒長於棗而上銳生青熟紅味極辛土人多食之又一作秦芡結椒向上者名天椒狀如柿子者俗呼柿子椒爲辣芡二字義同

萋蒿 爾雅作萋詩于以采萋是也周南言刈其萋疏葉似艾正月根芽生莖正白色可生食今呼萋蒿菜按萋音同山野原隰皆生焉

蕨 毛傳蕨也爾雅郭注初生之葉可食埤雅蕨初生狀如雀足之拳又如人足之蹶故名陸疏云蕨山菜也周秦曰蕨齊魯曰鼈關左人呼曰蕨山中處處有之二三月生莖嫩時無葉采取以灰湯煮去涎滑曬乾作蔬根紫色皮內有白粉搗爛洗澄取之名蕨紛又名爲如意菜以其初生葉拳未伸鉤向下時象如意故名

苦蕒 詩邶風誰謂荼苦大雅堇荼如飴爾雅荼苦菜也疏葉似苦苣而細斷之有白汁月令四月苦菜秀即此也花黃似菊初茁根葉皆可茹俗呼苗馬菜一種葉薄味苦者俗呼鵝鴨食菜

蓼 詩隰有游龍毛傳云紅草也陸疏云游龍一名馬蓼高丈餘一名紅蓼園圃種之以

供玩賞又名水葍子節間有毛葉如菸草花爲長穗其色深紅又有野蓼不種自生葉如柳花青白微帶紅色總之有紫蓼赤蓼青蓼香蓼水蓼木蓼馬蓼野蓼之別禮記鷄豚魚鼈皆實蓼於腹中而和羹膾蓋香蓼也今人但取蓼子生芽亦可茹

葵菜 古人常食故詩云烹葵及菽今罕供蔬者蓋古葵有多種羣芳譜及王氏農書皆云葵爲陽草爲百菜之主備四時之饌惟左傳云鮑莊子之足不如葵葵能自衛其足葵心隨日光所轉輒低覆其根故又名衛足花今遼境所產頂上作黃花大如盤亦隨日而轉俗名向日蓮其子皮青色可染罕有人食之者

鹿藿 一名營豆莢小而薄葉大如椒又名野綠豆遼境東山多有之牲畜嗜食土人多以之牧牛馬

芋頭 園蔬一種來自山東勝如地瓜地豆哺乳嬰兒最良遼境園圃亦有試種者惟不及山東之碩大而佳

地膚 爾雅謂之王芻今呼掃帚菜嫩可茹老時可爲筍帚子入藥名爲地膚子

薺 一名甘草師曠云歲欲甘甘草先生即言薺也應冬至而生北地多寒凍甫解即生苗葉畧似鳳尾草初生貼地如盤三四月間開黃花抽莖作臺一種毛薺白花結莢如小萍而有三角密綴莖上子細如沙折其莖作燈杖可避飛蟲之投故又各護生草薺初生根可茹詩云其甘如薺俗名甘蒂根即此

遂詩言采其遂注云惡草也俗羊蹄葉春生苗葉狹長一二尺似牛舌莖高三四尺餘色青節間微赤夏初起臺開青白花成穗結子三稜外皮大於蕎麥而實小夏至即枯子名金蕎麥根似大黃古人以爲惡菜惟凶歲凍初解時有掘其根以充食者至發葉後則有毒質

胡蘿蔔 李時珍云此菜分黃赤二種元時始入中國今北地多蒔之苗如邪蒿不可食冬月掘根生熟皆可啖兼果蔬之用今按嘉祐本草葫蘆巴蘇頌云番蘿蔔子可佐餐又可作菹

批藍 南方謂之芥藍葉可煮食北人謂之批藍根醃食甚脆

蘿蔔 爾雅云葵蘆艸今以圓而皮紅者爲大蘿蔔長而色白者爲青蘿蔔子入藥名菜菔子有根葉皆小四五月間纒之作菹者爲水蘿蔔

山藥 本名薯蕷亦可入藥蘇頌曰秋生實於葉間如鈴韓昌黎送文暢北遊詩云山藥煮可掘今按山藥產於懷慶者最佳實生於根圓而長至尺餘形不似鈴薯與蘇說異韓公所詠當即此遼境園圃多栽種者

越瓜 種始自越一名稍瓜短者爲菜瓜脆者爲脆瓜按菜瓜類似甜瓜惟其形較長味略酸

黃瓜 即王瓜月令孟夏之月王瓜生其種來自西域今爲常菜結瓜時色綠形細長略有茨蘇頌圖經胡瓜謂之黃瓜陳藏器云北人爲石勒諱胡改稱黃瓜

苦瓜 一名錦荔枝俗呼癩葡萄又名癩瓜味苦而皮癩亦堪作蔬
南瓜 時珍曰種出南番轉入閩浙二月下種四月生苗蔓延可十數丈葉狀如蜀葵而大如荷六七月開黃花結瓜正圓如西瓜皮上有稜如甜瓜一本可結十數顆其色或

黃或綠或紅經霜後收置處煖可留至春肉厚色黃同肉煮食尤佳本境農圃皆有之
倭瓜 種出自倭故名又名高麗瓜色黃形圓俗呼柿子瓜按種瓜不同故有圓長之別
然味無甚異爲本境普通食品

攪瓜 形橢圓類倭瓜而小老則肉生筋絨醬醃蜜餞皆可食食時以筋攪之其形縷如
切者

西瓜 胡嶠陷虜記嶠征回紇得此種歸名曰西瓜松漠紀聞西瓜如扁蒲而圓色青翠
經歲變黃其醃類甜瓜味甘脆中有汁尤冷遼陽產有三白金鑲玉青皮黑花臉虎黑
桃紋青皮斑條等名瓢分黃紅白色

土瓜 即地瓜詩經采葍采菲詩緝云菲也蒟也蒟采也蒟菜也土瓜也五者一物也

地豆 即土芋近因東洋人用爲佐餐常品種之者益多其形多圓故以豆名

打瓜 形似西瓜而小味甜而酸瓢白黃子大熟後剖瓜取子炒食最佳

冬瓜 本草一名白瓜深州風土記形類枕皮白如粉塗其子亦白本境春二月種若十

月種者結瓜肥好勝於春種冬瓜名以此但本境不宜

壺盧 蘇頌云即瓠瓜也狀大小不一夏末始實秋中方熟霜後方爲器莊子說剖之以
爲瓢即今壺盧今以長者名瓠子圓者名胡盧皆可食又有細腰者爲藥壺盧小而扁
者爲油壺盧至老而堅皆可備器用

紅花菜 即山丹花又名野百合高二尺許紅花五瓣東坡詩堂前種山丹錯落瑪瑙盤
瓠 詩幽風八月斷壺傳壺瓠也又云匏謂之瓠瓠形似越瓜長尺許夏中熟秋末枯本
境園圃皆種之

黃花菜 一名金針菜即今萱草花蕊也園圃多有種者

祥穀菜 根如山蒜而小生田原間俗名小根菜子入藥

山豆 葉關於榆似大豆蔓生莖圓紫灰色

酸漿菜 葉橢圓根紅嫩者酸而可食根深而滋蔓剷去復生最足害苗

河白菜 葉如白菜而厚生近水田間一名紫玉簪葉亦相似菜茹者多

薤 李時珍曰薤本作薤韭類也故字從韭從薤今人因其根白呼爲薤子江南人訛爲薤子其葉類葱而根如蒜收種宜火薰故俗人種爲火葱別錄云薤生魯山平澤蘇頌曰薤處處有之春秋分時至冬葉枯爾雅云薤山薤也生山中莖與家薤相類而根差長葉差大體性亦與家薤相類本境東山多有之

萊菔 李時珍按孫愐廣韻言魯人名菘遼音拉荅秦人名蘿蔔王禎農書蘿蔔一種四名春曰破地雖夏曰夏生秋曰蘿蔔冬曰土酥上古謂之蘆菔中古轉爲萊菔後世訛爲蘿蔔本境各種皆產之

茼蒿 時珍曰茼蒿八九月下種冬春採食肥莖花葉微似白蒿其味辛甘四月起臺高至二尺開深黃色花狀如單瓣菊花一花結子近百成毬此菜自古有之最易繁茂本境於春秋種之冬夏則枯矣

藜 李時珍云藜處處有之即灰藜之紅心者莖葉稍大河朔人名落藜南人名臙脂菜亦曰鶴頂草皆因形色而名嫩時亦可食故昔人謂藜藿與膏粱不同老則莖可爲杖

詩云南山有臺北山萊萊初生可食陸機注云即藜也

灰藜菜 時珍曰此菜莖上有細灰如沙而枝葉翹趨故名梁簡文帝勸醫文作灰滌菜訛傳爲灰條菜雷公炮製論謂之金鎖天藏器曰灰藜葉心有白粉似藜但藜心赤莖大可爲杖入藥不如白藜山野園林皆有之

莧 陸佃埤雅莧之莖葉皆高大而易見故其字從見指事也別錄曰莧實葉如藍十一月菜李當之曰即莧菜也宏景云莧實當是白莧所以云細莧細莧即是糠莧被霜乃熟故云十一月菜又有赤莧不堪食馬莧別一種布地即生實至微細俗呼馬齒莧恐非莧實也

馬齒莧菜 蘇頌曰馬齒莧雖名莧類而苗葉與莧都不相類一名五行草以其葉青梗赤花黃根白子黑也別處生之

茄 廣韻音伽本草云茄一名落蘇拾遺錄云隋煬帝改茄曰崑崙瓜又養生論治瘡方用乾茄諱名草鼈甲以能治寒熱故也蘇頌曰茄有多種處處有之紫茄黃茄南北通

有白茄青水茄惟北土有之入藥多用黃茄其餘惟可作菜今按本地所產白色青色長形者多紫色毬形者少本境各種具備

蘑 名類甚多乃濕熱餘氣所生曰糯以軟濕者佳也曰鷄曰縱因味似也南楚人謂鷄爲縱曰菌猶蝸也亦象形也蝸乃貝子之名或曰地生爲菌木生爲蛾北人曰蛾南人曰蕈本境所產頗多若油蘑形似草蘑柳樹蘑灰白色惟新性采食味美筍帚蘑色白味美亦新性爲佳草蘑形同榛蘑生於蔭腐葉間松傘蘑生松樹下色赤味美榛蘑生榛科下高腳灰白裏榆肉生樹窟中色黃善固腎氣食品所珍榆蘑榆根朽腐所化其餘若黃者青者凍青羊肚蒿子鷄豚銀盤粉子等名屈指難數本境東山皆產之

杏葉菜 本草釋名薺薺根如沙參葉如杏江南呼爲杏菜本境東山多產之

明葉菜 甜桔梗苗又花藍者俗名和尚頭

龍芽菜 有二種樹龍芽菜葉似椿而大初長刺條來年於頂上吐芽採爲茹地龍芽即升麻苗葉亦相似產於東山

廣東蕨 即貫象苗叢生紅紫色味鮮勝於青蕨產於山中多不見

貓爪菜 生不擇地葉形如貓爪故名春夏間採食之

疙疸白菜 種自俄來惟在本境所生不如俄菜大是亦天時地利關係然也

糖蘿蔔 種自倭來可以製糖本境內近亦多有種者

絲瓜 李時珍曰唐宋無聞今南北皆有之一名天羅長者數尺其狀蜿蜒如蛇瓜時以石墜之則直老則筋如亂麻可入藥或云近有以瓜絲製夏帽者質輕而良

草屬

繸麻 原隰之田種皆相宜葉大皮青高幾及丈夏末時熟花黃色半花半果時刈穫之漚水中數日剝皮爲麻用途甚多

菸草 原名淡巴菰本境多青菸即高麗菸至於黃菸品味不及吉林土產

棉花 夏開淡黃花秋結實如桃實熟則綻裂棉出以軋機去其子用爲衣絮或紡織本境高燥地多種之亦出產之一大宗

藍 莖高二尺許葉如蓼開小紅花成穗葉漚爲靛入藥則爲青黛鄭樵通志藍分三種
蓼藍染綠大藍如芥染碧槐藍如槐染青通名靛草詩云終朝采藍是也自靛油輸入
種藍者日少

茜草 蔓生莖方中空葉橢圓夏月開小白花根可染絳以山中產者佳並可入藥

芸香草 說文似苜蓿禮月令注香草也爾雅冀葉類豌豆而細叢生高一二尺乾時益
香夏開黃綠色花葉可避蠹園間隙地人多種之

銼草 多生山野中乾時可治木器

葦 說文大葭也一名萑詩八月萑葦蕭蕭蒼蒼是也亦名蘆爾雅注云葦一物而三名
也水塘多生之惟不及營海界之高大可製席箔也

羊草 西北邊謂之羊鬚草長尺許莖末圓勁如松針黝色油潤七八月刈積之經冬不
變生山野間可用飼養牛羊

莎草 說文一名侯莎爾雅翼莖葉近三稜根周匝多毛詩云南山有臺即此莖宜編蓑

衣香附子雀頭香皆其名也

馬蘭 說文莞屬玉篇似莞而細可爲席秋刈乾之冬可飼牛狀似蒲而細小花色藍無
香可染色根可爲刷月令荔挺出即此子入藥名蠶寶

老少年 一名秋紅一名雁來紅春夏葉色青黃至秋則漸紅如花土人謂之老來變又
一種六月葉紅者名十樣錦

香蒲 菡如笋可食名曰蒲笋茸入藥名蒲黃俗乎蒲棒又一種臭蒲名菖蒲

荇 本草水萍大者曰蘋中者曰荇小者曰萍周南采荇箋云葉圓赤紫莖如釵股

蘋 爾雅蘋同贅水上大浮萍也四葉相合中折十字浮生水面根連水底夏秋開白花
曰白蘋詩予以采蘋即此陸地者則青蘋也本境水塘菱茨間往往有之

藻 蘇頌曰溪泊中多有之葉大者曰馬藻葉細者曰水蘊詩云采藻重其潔也土人呼
水蘊爲雜草

菰 一名蔣俗名菱草春生筍亦可茹莖中如兒背者曰菱瓜結實曰菰米一云彫胡

水葱 生水中如葱而長又名翠管可爲席

萍 本草注小曰萍浮生水面或云楊花所化一葉經宿即生數葉下有微鬚即根紫背萍入藥

蓬 爾雅釋草鬻彫蓬薦黍蓬今人統呼爲蓬子蒿蓬草科

芄蘭 蔓生葉綠而厚斷之有白汁子長數寸俗名雀瓢籬落及樹叢上多生之又名蒯拉瓢秋老自裂子毛如白絮隨風飄散來年自生

貓兒眼草 宏景曰大戟苗生時摘葉有白汁又名澤瀉葉紋如貓眼山地多有之

佛手松 一名拳柏又名萬年松生石上拳彎如雞足可爲菸之佐料

水稗草 湖泊四邊多有之可牧畜

莠草 詩不稂不莠孟子惡莠恐其亂苗傳云莠與苗同秀而不結實惟大有年時少耳俗名狗尾草是也

章茅 如竹而細可苦房每節有二穗高四五尺一名礪礪草

黃背草 一名黃稗草又名羊草層層有節可代章茅本境東山有之今有溝名曰黃背草溝

荻 爾雅謂之蕭陸疏今人謂之荻蒿或曰牛尼蒿白葉粗科生多者數十莖可作燭歧出葉如藁本而細開繁碎小花纍纍如粟秋老結子細如沙落地自生荒塚廢廟中多生之

金絲草 生於垣牆頂上者多可醫嗽咳

靴喇草 本境東山有之農人冬時墊靴喇中用以煖足又可製紙

茨 詩牆有茨即此也一名蒺藜又名爬山虎附物甚堅子三角形有刺布地蔓生赤足者不敢行

金線重樓 時珍曰蟲蛇之毒得此治之即休故有蚤休螫休諸名重台三層因其葉狀也金線重樓因其花狀也甘遂因其根狀也紫河車因其功用也夏月開花一花七瓣有金絲蕊長三四寸至六七層諺云七葉一枝花深山是我家癩疽如遇著一似手拈

拏是也東山多有之

木屬

松 羣芳譜云松百木之長猶公故從公字種類不一土人以結子可食者爲果松無子者爲杉松脂多者爲油松葉細如針者爲毛松葉銳如刺者爲刺松出遼陽東山一帶今所伐殆盡

柏 李時珍曰萬木皆向陽而柏獨西指蓋陰木而有貞德者故字從白白西方色也陸佃埤雅柏之拍西猶針之指南也柏有多名入藥惟取葉扁而側生者故名側柏陶宏景曰柏到處有惟以泰山爲佳忌塚墓生者其葉以秋夏采者良本境亦頗有之惟不及東北爲多

槐 爾雅疏葉大而黑者名櫬晝合夜開者名守宮槐細而青綠者但謂之槐今山中皆有之花入藥未開者名槐子可染色花黃葉橢圓莢長寸許又一種來自日本皮外有刺堅硬發展甚速惟嚴寒時或至凍枯

杜 一名甘棠似梨而不結實移接梨樹結實甚佳東山多產之

椴 葉大皮黑紋細微赤者曰紫椴山蓇多生椴樹之下皮可爲繩引火昔時放鳥銃皆用之又可爲蓑衣

椿 葉香可噉者爲香椿

樗 似椿而葉臭土人呼爲臭椿

楸 類核桃葉羽狀甚大木細緻可製箱櫃之屬

刺楸 葉爲瓜形皮有刺木堅緻有花紋可製箱櫃之屬

茶樹 實如蝴蝶葉可爲黑色染料俗呼山茶葉

欒栲 生山上者爲山欒栲質堅緻可爲槍桿以蠟蟲食之又名蠟條又有水欒栲生近水處皮厚無黑斑文高大者材中棟梁

柳 說文小楊也埤雅云柳與楊同類縱橫顛倒植之皆生蓋柳之種類不一鄉村多植杞柳此柳長條下垂木性極柔用火逼以揉之可爲箱篋羅圈告子言杞柳爲柶捲者

即此葉似桃而狹長花爲小穗春老絮飛似蘆葦花鋪地如棉黃絲嫋嫋點綴村景亦屬不可少之木也陸疏云杞柳屬生水傍葉粗而白色木理微赤似以河柳爲杞柳也楊木名柳屬而葉大於柳王氏群芳譜云楊有二種白楊葉芽時有白毛裹之及盡展似梨葉而稍厚大淡青色背有白茸毛蒂長兩兩相對遇風則簌簌有聲高者十餘丈大者徑三四尺青楊比白楊較小木亦聳直高數丈大者徑二三尺葉似杏而稍大色青綠北方材木全用楊柳榆槐四木是以人多種之植宜下隰地木質不甚堅而能任重三五年便成材是可貴也

榆 爾雅釋木云蘊莖郭注今之刺榆陸疏云榆有十種葉皆相似皮及木理異惟刺榆白榆結子亦異白榆結子如錢刺榆結子纍纍如粟嫩皆可食嵇康養生論榆令人瞑博物志啖榆則眠不欲覺此言凡榆皆然詩唐風山有樞即刺榆也郭注無姑其實夷即姑榆也生山中葉圓而厚所謂蕪夷是也詩陳風東門之粉即白榆是也本境榆類甚多皆美材刺榆花榆尤佳刺榆可爲車軸花榆理細可爲几案凡榆臃腫處花紋尤

勝可飾器用人多珍之

桑 苞本名處處有之爾雅釋木云女桑椹桑山桑桑有葢有家桑野桑之別家桑葉大徑半尺許微圓而末尖不結實分根壓條皆可栽植野桑葉小而薄結實纍纍生青熟紅熟極則黑數十粒黏而爲一種之亦生但罕長大材未徑尺則木皮即裂木質色黃根皮外黃內白堅韌似麻可造紙入藥曰桑白皮

檠 毛傳山桑也說文云檠山桑有點文者枝幹與園桑相似葉薄而小多極似花叢生無大木飼蠶最宜絲名檠絲禹貢曰厥篚檠絲檠桑條長有白斑點甚最多可食山野多有之

柘 桑之別種與山桑枝葉畧同惟枝有刺葉有毛葉薄有歧杈亦可飼蠶絲中琴瑟絃清響勝凡絲山野間有之

栲 似樗而葉差狹爾雅注謂之山栲色微白生山中唐風詩云山有栲

柎 爾雅謂之櫨似棗細葉葉新生時可飼牛皮理糾結質最堅俗呼柎筋子木大者爲

車軸次於刺榆唐風詩隰有杻是也

柞 詩云析其柞薪柞與栩相似但栩葉長而尖柞葉闊而圓柞樛枝有四稜木漸大則皮皴厚稜亦漸隱性堅強中爲車材長極遲葉大如荷蒂長名波羅葉皮黃可染色
櫟 亦柞類一名栲質堅土人多以燒炭實名橡子蒂曰橡椀可染皂按櫟葉染皂亦佳
械 鄭箋云械白椶也山木之小者爾雅云小木叢生有刺實如耳瑤紫色可啖色深黃中心黑赤幹直不曲中有細孔可刻爲杖子大如小錢圓扁勻淨文理極細俗呼曰扁蛋核線穿成串以供手玩

青剛柳 亦柞類材中爲弓葉較櫟爲薄

煖木 或云即黃蘗木皮煖可包弓把細者中爲鞭桿及文明杖之用俗名黃樺櫛木

荊條 皮有紅白二種紅者可爲筐篋皮黑而粗勁者名鐵荊條可爲杖

皂筴樹 刺長皮潤角如豬牙者入藥長而厚肥者多脂長而瘦薄者枯燥子黑

山藤 木之類結子色紅枝柔韌中爲鞭桿今有以之爲文明杖者

明開夜合木 一名金銀柳結子如花木理細潤

老鸛眼 一名鼠李木堅緻有花紋皮可染色子赤黑如老鸛眼故名

東瓜木 似柞柳皮色青名水柞柳質堅中爲硯質輕易攜頗能下墨雖非奇玩亦自可

珍此木生於窪地葉橢圓而有鋸齒木紅而脆入水久不爛土人多用墊井底

黃楊 木堅難長東北大山間有之

棘 一名槭有赤白二種結子者名酸棗仁入藥不結子者爲牛棘俗呼棗刺科

冬青 寄生樹上葉厚微圓無筋子紅或黃經冬不凋

亮木 古木根莖所化夜觀有光遇雨益明移置室中即可燭物山中往往有之

臭梧桐 葉大色青八月莢熟長如豇豆滿垂如穗今人多種以爲玩賞

阿哥青 種來自外國複葉類槐色嫩綠花淺黃子結莢如扁豆秋成熟

元寶楓 種來自美國皮似楊葉尖分三瓣經霜則紅如二月花

苦丁香 葉圓有光而厚花細成叢下垂分紫白二色生山者曰野丁香

萬利木 來自美國生長成材最速可爲電杆道木今境多有栽種者
樺 葉橢圓多紋木外有浮皮大者可製船

榿 俗名胡櫟葉大可飼蠶實與柞同而圓

達子香 高尺許滿人祭祀用以作香春末開紅花根香故名達子香
女貞 俗名女木生背陰地皮常青抽條甚長

花屬

長春花 葉似柳而厚柔條紛披黃花爛漫逐時開花俗名到挂金盅

迎春花 立春即開花色黃如長春

探春花 春過始開故名

金雀花 羣芳譜葉似槐而小季春開黃花形尖而旁有兩瓣狀如飛雀故名

牡丹花 木本諸色不一重瓣有徑七八寸者遼境初夏盛開惟冬多烈風必以土壅之
來春方茂

薔薇花 本多刺花有紅白二種單瓣者甚多

十姊妹 莖似玫瑰而小一枝數朵相簇不甚可觀多用本接月季

玫瑰花 小葉橢圓莖有刺花重瓣紅者可入食品黃者花微小俗呼刺玫野開者花皆

單瓣色紅子赤名山刺玫

鳳仙花 群芳譜莖有紅色白色葉長而尖似柳桃開花時頭翅羽足俱翹然如鳳狀俗
呼指甲草性能透骨子入藥

木槿花 即詩所云舜華也群芳譜一名朱槿花木如李高五六尺多歧枝可種可插葉
繁密如桑末尖有極齒花五出自仲夏至仲冬花開不絕又有謂木槿爲常有之花大
者高丈餘樹白色葉長微狹有極花大如盞花粉紅者頗似大黍菊花瓣數重花開於
五六月朝開夕落本境無仲冬開花者

生菜蓮 花有紅白二色單瓣朵大內生核中有子入藥名罌粟

虞美人 似生菜蓮而小

翠蛾眉 隨日側映鮮妍有致

蜀葵花 花色不一俗呼黍菊花紫者可染色紅白者可治帶疾一種莖短花小而單瓣者錦葵也俗呼小黍菊

向日蓮 即葵花

荷花 詩謂之菡萏與雅謂之芙渠今名蓮花有紅白二色大而豔

雞冠花 李時珍曰以花狀命名處處有之三月生苗入夏高者五六尺矮者數寸其葉青柔頗似白苧菜六七月開花形如雞冠有黃紅白數種花最耐久霜後始焦子在穗中黑細光滑

高麗菊 似草芙蓉而小花黃赤色

護草花 一名鹿葱喜生陰地花六出四垂嫩時采之即金計菜相傳食之可忘憂詩云焉得護草言樹之背可入藥

六月菊 金錢花旋覆花皆此也爾雅疏覆一名盜庚覆即旋覆花入藥

牽枝牡丹 俗名串枝蓮蔓生花粉紅色

扁竹蘭 宏景曰射干蘇頌曰射干之形莖梗疏長正如射之長竿狀故名高二三尺花黃實黑根多鬚皮黃黑肉黃赤所在多有花形三角即射干花

山臙脂花 一名臙粉豆花紅黃紫白諸色類牽牛喇叭狀又名粉團花俗名草茉莉

紅藍花 史記集解引徐廣注曰茜一名紅藍其花染繒赤黃然紅藍染色以花不以根茜草染色以根不以花兩物之用迥異而紅藍挺生茜草蔓生形質又異紅藍草俗名紅花亦入藥園圃中多有種者

馬櫻花 花如絨團一名合歡其葉晝舒夜捲

金盞子花 本草釋名杏葉草長春花時珍曰金盞其花形也長春言耐久也秋後有子如雞頭實花黃如盞秋深猶茂

玉簪花 此花處處有栽種者二月生苗成叢高尺許柔嫩如白菘葉大如掌葉文如車前草嫩嬌無比花開二三寸長本小末大一名白鶴仙未開時如白玉搔頭黃紫者差

小亦名玉簪宜在背陰地

捲丹花 六出四垂大於山丹先結子枝葉間入秋開花於頂根如百合俗名捲蓮花

石竹花 枝如竹小葉細長花單瓣色雜俱備入藥名藿麥

剪秋羅 有紅黃諸色四圍參差如剪故名

秋葵花 色正黃開亦向日與向日蓮各爲一種

荷包花 亦海棠類花形似荷包鬚與花如穗下垂故名

百日紅 木本花如丁香

千日紅 草本葉狹長花有粉色開於枝梢至冬葉雖萎而花不萎俗名乾疤花

醉八仙 紫如丁香

蘭花 葉如韭花粉紅色叢生莖上

蔦蘿花 蔓生葉如漢花紫紅色

江西臘花 花似菊色亦不一枝頗搖曳或云來自江西故名

水蘊花 高者丈餘多生下隰地詩隰有游龍即此今園中往往植之

綉毬花 叢生如毬

菊花 禮記季秋之月菊有黃華本境天氣稍寒諸花皆晚開惟菊開應節向有旗人劉

咸和善養菊諸種之花至冬仍盛

凍青花 葉如柳而圓新葉生舊葉始脫花紫色冬含蕊春夏方開

月月紅 即月季花

西番蓮 種自西域來花大如菊色亦不一今人多栽種惟畏嚴霜

佛頂珠 亦鳳仙花之類特獨莖花開頂上大於鳳仙花數倍

小桃紅 葉如櫻桃花紅色似桃而大瓣重極多夏歷正月末即能開放

果屬

櫻桃 本草釋名櫻桃含桃荆桃皆是也時珍曰樹不甚高春初開白花葉團有尖及細

齒結子一枝數十顆三月熟時須守護否則鳥食無遺鹽藏蜜濺均可林洪山家清供

云櫻桃經雨則蟲自內生水浸良久則蟲皆出乃可食也本境多產之

杏 蘇頌曰杏處處有之種類亦多黃而圓者名金杏相傳種出自濟南或謂漢帝杏言漢武帝上苑種也熟最早其扁而青黃者名木杏山杏多不勝數寇宗奭曰金杏深赭色核大而扁乃接成者其味最勝又有白杏熟時色青白或微黃味甘淡而不酢王禎書農云北方肉杏甚佳赤大而扁謂之金剛拳本境皆有之

桃 李時珍曰桃性早花易植而子繁故字從木兆言其多也核仁入藥當取解核者種之易茁山桃仁不堪用今市賣者果雖大係接他木而成究不如本境天生者為佳

松子 按本草松子出遼東及雲南今烏喇寧古塔山中最多俗名松塔塔中子可食如榛而長每塔約數百粒

榛 生於遼東山谷樹高數尺子如小栗時珍曰樹低小叢生花成條下垂長二三寸二月生葉葉多皺紋有細齒及尖其實作苞三五相黏一苞生青熟褐其殼厚而堅其仁白而圓大如杏仁

栗子 說文作栗从木从鹵象花實下垂之狀也木大而堅皮皺而厚嫩枝赤色葉類櫟

五月華九月采結實有房似球多制每房藏三四子不等以椽而不圓霜降後其房拆裂子自落本境千山所產甜美遜於范陽木質堅硬或用為棺料

山櫨 時珍曰山櫨味似櫨子故名爾雅欒梅欒樹如梅其子大如指頭赤色似小柰可食即山櫨也此物生於山林者多猴鼠喜食之士人呼為山裏紅大者曰酸櫨

棗 棗木赤心有刺四月生小葉五月開小花色白微青本境所產不及直魯之肥大甘美

安石榴 張騫使西域得安石國榴種以歸故名五月開花有紅黃白三色單葉者結實千葉者不結實或結亦無子實有酸甜苦三種潘岳賦榴者天下之奇樹九州之名果千房同膜千子如一禦飢療渴解醒止醉折條盤土內便生本境原無此皆關內移來以盆植之

梨 種類甚多渤海傳果有樂浪之梨今千山及廣寧者為上接梨香水梨平頂香或鮮

或凍或蜜濺以時入貢又有酸梨皮黑而酢梨乾亦爲珍品

棠梨 爾雅云杜甘棠也赤者杜白者棠或云牝曰杜牡曰棠或云澀者杜甘者棠杜者澀也棠者糖也未說近是棠梨野梨也山林有之樹似棠而小葉似蒼朮亦有團者三叉者葉邊皆有鋸齒二月開白花結實如小棟子大霜後可食其樹接梨甚佳有甘酢赤白二種

葡萄 李時珍曰漢書作蒲桃可造酒酺飲之則陶然而醉故有是名圓者名草龍珠長者名馬乳葡萄白者名水晶葡萄黑者名紫葡萄漢張騫使西域還得此種山產者一名夔臬苗葉與園種相似惟園產者大而味佳釀酒亦良近來本境所產極多每年輸出不下數千萬斤惟尙無造酒者

香瓜 即甜瓜禮記爲天子削瓜指此前清禮部供祀有瓜園向有銀皮芝麻粒高麗瓜諸名今密瓜尤佳蒂入藥名苦丁香

李子 爾雅翼云李乃木之多子者故字從木子時珍曰普通之李綠葉白花樹能耐久

其種近百其子大者如杯如卵小者如彈如櫻其味有甘酸苦澀其色有青綠紫朱黃赤縹綺臙脂青皮紫灰之殊早則有麥李御李四月熟遲則有晚李冬李十月十一月熟遼境所產多早李五月乃熟

稠李子 一名櫻額梨果形如野葡萄而稍小味甘澀清時乾之入貢暑月服之可以止瀉

山梔子 葉似稠李實小而圓柄極長熟時蜜濺甚佳

枸柰子 葉互生橢圓而長花淡紫色實如麥粒而大色紅其根亦入藥名地骨皮

菱 一名芰色有紫有黑形有兩角三角四角佳者歲取供祀實曰菰米又曰菱角米

芡 與菱同生水中葉圓大於荷葉色嫩翠可愛惟刺利如針芒漏於葉面上子如榛子結聚百十粒於毛殼內形如雞頭故俗名曰雞頭米入藥名芡實

蓮實 莖出水數尺形如碗每顆十餘粒粒橢圓有尖嫩時青色可食兼以充蔬

郁李 爾雅謂之棠棣今多生山原間子如櫻桃仁入藥又有一瑞兆凡郁李收者歲必

大熟

蘋果 葉橢圓鋸齒甚細春暮開花粉紅色果圓略扁熟則紅碧相間味甚鬆美近年由東洋傳來樹苗結實較大間有栽植者

沙果 花紅類也果似花紅而大略扁熟則黃色

花紅 葉橢圓有鋸齒暮春開花色白有紅暈夏末果熟形圓而紅味酸

山核桃 生楸樹上形似胡桃而長殼堅厚肉味頗勝

文官果 形如小香瓜雜俎云形如螺蓋別一種

無花果 不花而實生於枝葉之間種自南來園圃中不恆有

燈籠果 外垂絳囊中含赤子如朱櫻俗呼紅姑娘味苦不甚可食

馬鈴薯 根結實大小纍纍可為蔬飯又可製粉條俗名地豆子本草名土芋

落花生 有大小二種未悉種來何處莖高尺許蔓延地上葉似大豆而光澤夏時開蝶

形黃花子房入地二三寸結實成莢圓長多皺紋炒熟食之味香境內種者頗多

歐李 叢生高二尺餘葉似李如櫻桃味酸澀

普盤 葉橢圓莖多刺實如桑甚本地生者實小蔓生實較大者名高麗普盤俗呼唾盤

藥屬

人參 遼境諸山曾有之今漸少凡初夏得者曰芽參花時得者曰朶子參霜後得者曰

黃草參參鬚參葉參子參膏無不珍之高麗人參贊曰三極五葉背陽向陰所來求我

根樹相尋頗得其形似

茯苓 生松下抱木者為茯神大山多老松茯苓茯神及松香時聞有之

牛蒡子 葉大如芋而長實似葡萄而褐色外殼似栗球而小多刺根有極大者作菜茹

益人一名惡實業大亦可為火絨俗名老母猪啍產於山野

藁耳 陸疏云實如婦人耳端鄭康成曰胡藁攷博物志洛中有人驅羊入蜀胡藁子多

刺黏羊毛上遂至中國故名羊負來即詩卷耳也俗呼蒼耳子有刺多掛人衣

漏蘆 時珍曰屋之西北黑處曰漏凡物色黑謂之盧此草秋後即黑異於衆草故有此

名生山野間花紫色微有白毛蕊黃色三月花開根入藥可下乳俗名毛骨突花是也
因陳 本草綱目曰此雖蒿類經冬不死更因舊苗而生故名因陳時珍曰昔人多蔣爲
蔬曰家因陳入藥用山因陳今南人二月二日猶采野苗和粉麵作餅食之二月生苗
莖如艾九月開黃花細瓣結實大如艾子俗名萬年蒿語云二月因陳三月蒿此也
五靈脂 即寒號蟲糞寒號蟲即蝙蝠也

白丁香 即家雀糞入藥

郁李仁 俗名歐李子

五味子 蔓生葉厚而光夏末開白花實紅色爾雅謂之葶藶因蔓藤中具五味故名入
藥以遼五味爲佳品

白附子 異物記云生東海新羅及遼東苗與附子相似根如草烏頭之小者長寸許乾
者皺文有節一名節附俗呼兩頭尖產本境者通行遠省

細辛 葉闊而尖有長柄生於莖花黑紫而三瓣根多鬚入藥一名少辛管子云五沃之

土羣藥生少辛是也醫以遼細辛爲佳通行各省

黃精 服食上品博物志云太陽之草曰黃精初生苗土人采食之名筆管菜高半尺許
葉長而寬夏初開白花下垂如鈴結實如黑豆曰黃精本境東山多有之

玉竹 莖有稜葉橢圓形有平行脉花色微白兼綠形如小鈴根入藥似黃精苗即小筆
管菜又名葳蕤

芍藥 詩云贈之以勺藥毛傳云香草也韓詩外傳云離草也古人多有以爲食料者今
用之爲藥材無有以爲蔬者陸疏云今藥草無香氣非此也遼陽處處有之婦孺皆識
蓋芍藥爲草中之花有宿根春煖苗地生紅芽尖銳如筍莖高二三尺傍生歧枝一枝
五葉畧似牡丹而狹長花開四月中色分紅黃紫白或粉紅皆可供玩賞赤芍卽芍藥
根

艾 爾雅謂之冰臺博物志云削冰令圓舉冰向日以艾承其影則得火故名冰臺此物
宿根易生莖高數尺葉似菊面青背白有茸而柔厚刈暴乾之點火不熄醫家取之灸

百瘡故名炙草又名醫草

百合 宏景曰俗人呼爲強仇根如蒜頭有瓣又一種卷丹子生葉間又山丹似百合而小根皆可食蓋一類三種惟百合入藥

車前 詩云芣苢好生道旁布葉如輪俗呼車輪菜抽穗結子即車前子

桔梗 有甘苦二種古名齊芩即杏葉菜其明葉菜根爲甜桔梗今不多見

五加皮 五葉交加故名宜漬酒

貝母 花白葉似韭詩云言采其蟲蟲與商通注貝母也其葉似桔樓而細小其子在根下如芋子色白

龍膽草 葉對生有三縱筋夏開白花根味苦

遠志 苗名小草即詩之萋也

貫衆 葉圓碎一枝而衆葉貫之又名鳳尾草入藥用根

石韋 其葉生苔上背陰處亦可采以代茗

衛矛 幹皮薄旁展者翦羽

柴胡 葉狹長互生夏日開小黃花根入藥質硬者竹葉柴胡質柔者韭葉柴胡

防風 葉似青蒿而短小莖四稜高一二尺五月開細白花實似蘆蒺子而大根土黃色

可治風病故名

薄荷 揚雄甘泉賦作菱薜蘇頌曰薄荷處處有之莖葉似荏而尖長二月宿根生苗清明前後分之方莖赤色其葉對生初蒔形長而頭圓及長則尖本境園圃皆有之

女貞子 即桑寄生桑上之凍青也一名蔦

獨活 莖葉皆有毛小花五瓣一莖直上實紫色根入藥按此草服之有風可止風無風轉能引風故又名無風獨搖世有以爲草生地上能無風動搖者誤

苦參 葉互生夏月開黃花成穗結長莢子如小豆根入藥

升麻 莖高二三尺夏開白花蕊紫黑而多鬚去鬚用之

荊芥 莖柔輒爲箭鏃形秋開綠色小花

扁蓄 莖弱有節葉細如竹三月開紅花

牽牛 即黑白二丑俗名喇叭花入藥黑者力速

紫草 葉畧似雞冠莖葉俱有白毛夏日開小白花於頂根又爲紫色染料亦名苾草
王不留行 宏景曰今處處有之葉似酸漿子似菘子三月收苗五月收子葉對生無柄
花如鈴鐸實如燈籠子黑色入藥時珍曰此物性走而不住雖有王命不能留其行走
故名

瓜蒞 即詩之果臝根如天花粉前志載之今不多見

白頭翁 花紫色而有白毛蔽之近根處有白茸下垂

茺蔚 詩名葍今名益母草葉略似艾而細碎初夏開淡紫花產婦服之有益故名

夏枯草 寇宗奭曰今謂之臭鬱草處處有之亦茺蔚之屬方莖白花夏至卽枯故名

葶藶 亦入夏卽枯月令孟夏藶草死卽此

藁本 根上苗下似禾藁故名本木根也古人香料用之呼爲藁本香山海經謂之藁若

藥錄云藟芎苗藁似本花實乃不相同五月開白花八月結子根紫色本境東山多有之

蛇床 田野墟落甚多花葉正似蘼蕪葉青碎作叢似蒿苗高二三尺枝上有花百餘結
同一窠似馬芹類四五月開白花又似傘狀子黃褐色如黍米至輕爾雅謂之虺床本
境所產不如揚州爲良

蒼朮 卽鎗頭菜根形如薑蒼黑色而肉白

大薊小薊 二者葉刺相似田野甚多二月生苗二三寸時併根作菜茹食甚美四月高
尺餘心中出花頭如紅藍花花青紫葉多刺俗呼千針草又曰牛戳口有大小二種四
月采苗九月采根并陰乾用大薊苗根但肥大爾

硝 城土熬成皮硝可攻皮芒硝可入藥火硝備軍需又鹵地亦可熬城

急性子 鳳仙花子也成則自裂故名

麝香 麝臍中香也生得最難

牛黃 多於牛胆中得之成雞卵及各形狀黃入水則破

獼皮 刺猾皮也

蜂蜜 蜜蜂所釀者可用

蜂房 即蜂窠也

白蠟 蠟樹所生者蠟樹即樺栢也

原蠶沙 晚蠶矢也淘淨晒乾用之

桑螵蛸 桑樹之螳螂卵也

滑石 色白微綠有珠光質極軟

僵蠶 以頭蠶色白未吐絲者糯米泔浸一日漉起焙乾用之

菟絲子 爾雅謂之唐蒙詩云爰采唐矣即此抱朴子曰菟絲之草下有伏菟之根無此

菟則絲不得生於上然實不屬也按菟絲子今遼境豆田多有之俗呼黃藤子甚害豆苗

蒲公英 千金方作鳧公英生平澤田原中莖葉似苦苣斷之有白汁可生噉到處有之

即地丁也四時常有花花罷飛絮絮中有子落處即生中心抽一莖端出一花色黃如金錢又訛爲僕公嬰遼境尤多俗名婆婆丁